

# NGĀ WHANAKETANGA RUMAKI MĀORI



Te pakari haere o te reo matatini me  
ngā mātauranga pāngarau o tō tamaiti

He kupu whakamōhio i ngā  
mātua me ngā whānau



## HE AHA TĒNEI MEA, TE WHANAKETANGA RUMAKI MĀORI?

E whakaatu ana *ngā Whanaketanga Rumaki Māori* i te tupu haere o *ngā tamariki o ngā Tau 1 ki te 8*, i roto i *ngā akomanga rumaki reo Māori*, mō te wāhi ki te reo matatini me te pāngarau.

Ko tā *ngā Whanaketanga*, he whakaatu atu ki *ngā mātua, ngā whānau, ngā pouako me ngā tamariki* he aha *ngā mea e tika ana* kia tutuki i *ngā tamariki* i roto i te reo matatini – taha kōrero, taha pānui, taha tuhituhi – me te pāngarau.

Katoa *ngā kura e whai ana i Te Marautanga o Aotearoa*, ka hāpai anō i *ngā Whanaketanga Rumaki Māori*.

### 🌀 He aha i whakatakotoria ai ngā Whanaketanga?

Ka hiahia tonu *ngā mātua me ngā whānau* ki te mōhio e pēhea ana te ako a te tamaiti – mēnā kei te huarahi tika, kei te wāhi anō o taua huarahi e rite ana mō tōna taipakeke me tōna roa ki te kura.

Whāia ai e *ngā pouako ngā Whanaketanga* hei whakamōhio i *ngā mātua, ngā whānau me ngā tamariki* kei hea ake *ngā tamariki* i roto i *ngā akoranga, ā*, he aha *ngā mea e tika ana* kia tutuki i a rātou i muri iho. Arā:

- ka whakaahuatia he aha *ngā mea e tika ana* kia mōhio tō tamaiti, kia taea e tō tamaiti, i tēnā, i tēnā pae ako – taha kōrero, taha pānui, taha tuhituhi, taha pāngarau
- ka tāpaea *ngā tūmanako* kia mārama tonu te takoto – taha kōrero, taha pānui, taha tuhituhi, taha pāngarau.

Ko *ngā Whanaketanga* hei akiaki i *ngā pouako, ngā mātua me ngā whānau* kia mahi tahi ki te whakapiki i *ngā tamariki*, kia puta ai rātou i te kura me *ngā tohu mātauranga e hiahiatia ana e rātou*.

## **☪ Ka pēhea te whakaatu mai a ngā Whanaketanga i te neke whakamua a taku tamaiti me ngā mea e taea ana e ia?**

Whakamahia ai e ngā pouako ngā Whanaketanga hei whakaatu atu ki a koe:

- e pēhea ana te haere o tō tamaiti i roto i ngā mahi ako mō te kōrero, te pānui, te tuhituhi me te pāngarau, ina whakatairitea ki ngā Whanaketanga
- he aha ngā mea e taea ana e tō tamaiti i roto i ēnei momo mahi e whā
- he aha ngā mea taihoa ka ākona e tō tamaiti, he aha anō ngā whāinga ako kua whakaritea tahitia ki a kōrua me tā kōrua tamaiti.

## **☪ Me pēhea tēnei e āwhina ai i a au, i taku tamaiti?**

Mā te kōrero tahi ki te pouako ka mōhio kōrua ko tō tamaiti kei hea ake ia e haere ana mō te wāhi ki te ako, kua ahu pēhea ināiane, ā, he aha ngā mea ka taea e koe hei āwhina i a ia ki te whakatutuki i aua whāinga ako kei mua tonu i te aroaro.

## **☪ Me pēhea te pouako e mōhio ai kei tēhea whanaketanga taku tamaiti e haere ana?**

Ka whāia tonutia e te pouako ngā ara huhua hei whakatau kei tēhea pae ako tō tamaiti, ā, e pēhea ana te kaha o tana whanake haere – taha kōrero, taha pānui, taha tuhituhi, taha pāngarau. Anei ētahi:

- te mātakitaki, te whakarongo ki tō tamaiti i a ia e mahi ana i te akomanga
- te kōrero ki tō tamaiti mō ngā mea e ako ana ia
- te aromatawai a te tamaiti i āna ake mahi me ngā mahi a ētahi atu
- te whakatakoto i ētahi mahi hei mahi mā tō tamaiti
- te whakahaere i ētahi aromatawai, i ētahi whakamātautau.



# TE TUKU PŪRONGO KI NGĀ MĀTUA ME NGĀ WHĀNAU

Atu i te tau 2011, me mātua tuhi pūrongo ngā akomanga rumaki reo Māori, i ngā wā e rua i te tau, ki nga mātua me ngā whānau, e whakamārama ana i te pakari haere o te tamaiti, me ngā mea ka taea e ia, ina whakatairitea ki ngā Whanaketanga. Me kōrero koe ki te pouako mō ngā kōrero e hiahia ana koe kia noho mai ki te pūrongo, ā, me reo Māori, me reo Pākehā rānei te pūrongo.

Mā te pūrongo e whakaatu mai mēnā kei te wāhi tika o te huarahi ako tō tamaiti e haere ana, ina whakatairitea ki ngā tūmanako hua ako kua whakatakotoria mō ngā tamariki katoa o tōna kāhui taipakeke.

## 🌀 He aha ngā takahanga ako ka whai i muri ake?

Kei te pūrongo anō pea a te pouako ētahi kōrero mō ngā akoranga taihoa ka whāia, ā, he aha ētahi mahi ka taea e koe, e te whānau i te kāinga hei tautoko i te ako a tō tamaiti. Anei he taura o ngā takahanga ako ka whai i muri ake:

### NGĀ WHANAKETANGA: PĀNGARAU

#### Te ahu whakamua

##### Kua whakaritea e Hoani ēnei whāinga ako māna:

- Kia kaha ake ki te whakamārama rautaki whakaoti rapanga
- Kia māia ki ngā meka whakareatanga matua katoa
- Kia ako ki te hanga kauwhata ki te ripanga rorohiko.

##### Tā te kura:

Hāunga te tauanga, e pakari ana te eke panuku a Hoani i ngā whanaketanga pāngarau. Ko te tauanga te tino aronga i ngā wiki kei te tū mai, arā:

- te tuhi me te whakamāori kauwhata pou
- te arotake tūhuratanga raraunga.

Ko te mōhio o Hoani ki te tau ka tino āwhina i a ia i ēnei akoranga.

##### He whakaaro mō te whānau:

- Whakawhitihiti kōrero mō ngā momo kauwhata e kitea mai ana i ngā niupepa me ētahi atu wāhi
- Tonoa a Hoani kia whakamārama i ana tūhuratanga tauanga.

#### Looking ahead

##### Hoani has set these goals for himself:

- To get better at explaining problem solving strategies
- To be confident with all times tables
- To learn to produce graphs using a computer spreadsheet.

##### At school:

Apart from Statistics, Hoani is making good progress against ngā whanaketanga pāngarau. Statistics will be the main focus over the next few weeks, namely:

- drawing and interpreting bar graphs
- evaluating data investigations.

Hoani's knowledge of number will be of great benefit in this work.

##### At home:

- Discuss graphs when they appear in the media
- Ask Hoani to explain the statistical investigations he is undertaking at school.



## He pātai hei tuku māu ki te pouako

- E pēhea ana te haere o taku tamaiti (i roto i ngā mahi ako)?
- He aha ngā mea e tutuki pai ana i a ia?
- He aha ngā mea me āwhina rawa e tutuki pai ai?
- He aha ngā mea ka ākona e ia ināianei?
- Ka pēhea te tautoko mai a te kura i a ia?
- He aha he mahi māku i te kāinga hei āwhina i taku tamaiti ki te eke i ngā taumata e tika ana mōna?
- Me pēhea taku whai wāhi atu ki ngā mahi ako a taku tamaiti i roto tonu i te kura?
- He aha te huarahi pai katoa e mōhio tonu ai au e pēhea ana taku tamaiti i roto i āna mahi ako?
- Me pēhea taku āwhina i taku tamaiti mēnā kāore au e mōhio ki te kōrero Māori?

Mā te mārama ki te whanake haere a tō tamaiti, mā te mahi tahi ki te pouako ki te tautoko i a ia, ka eke tō tamaiti ki ngā tino taumata mātauranga ka taea e ia.

## He mea anō e hiahia anō koe ki te mōhio e pā ana ki ngā *Whanaketanga Rumaki Māori?*

- Kōrero atu ki te pouako
- Toroa te pae tukutuku a Te Tāhuhu o te Mātauranga mō ngā mātua: **[www.minedu.govt.nz/Parents/YourChild/ProgressAndAchievement/NationalStandards/NgaWhanaketangaRumakiMaori](http://www.minedu.govt.nz/Parents/YourChild/ProgressAndAchievement/NationalStandards/NgaWhanaketangaRumakiMaori)**

He kōrero anō kei te pae tukutuku nei mō ngā tamariki ka uaua ki a rātou te ako, he mate, he hauā nō rātou.

- Pānuitia ngā Whanaketanga i: **[www.minedu.govt.nz/theMinistry/Consultation/NgaWhanaketangaRumakiMaori](http://www.minedu.govt.nz/theMinistry/Consultation/NgaWhanaketangaRumakiMaori)**

He tauira utukore anō o te mātārere nei e taea ana te tono i te rārangi rauemi tuihono a Te Tāhuhu o te Mātauranga, a *Down the Back of the Chair*, i **[www.thechair.minedu.govt.nz](http://www.thechair.minedu.govt.nz)**

me tono ā-īmēra rānei: **[orders@thechair.minedu.govt.nz](mailto:orders@thechair.minedu.govt.nz)**  
– me te tohu i te nama take 700061.